



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tir\_yimiyim



tir yimiyim

TAPAK 8

**Southern Philippines nung menoknok agi nisung 32 asü**

**Eriksen süjia aoba sülen temang tajungba lir**



VOL. XXIII ISSUE NO. 236 (ADOK 236) DIMAPUR SANGTENNÜ (TUESDAY) AAMI (JUNE) 09, 2026

₹ 5.00

## Dimapur Police-i Akangkokba Ao (68) apu

**Dimapur, June 8, 2026 (TYO):** Dimapur Women Police Station nung tanur tetsür ka dak tashiyim agi shi nung medemba ken o benokba dak sendakba nung tai tonglokja alir nisung tasembuba puogo.

Iba nisung ya arishi küm 68 tain Akangkokba Ao ta jangjaogo aser pa ya Unger nung asür Imsunukshi'er jabaso lir ta Dy. Commissioner of Police (Crime) cum PRO Dimapur, Khekali Y. Sema, NPS-i sangdong ka nung ashi.

Akangkokba Ao ya Residency Colony, Dimapur nung alir aser POCSO Act kübok June 7, 2026 nü apu ta Khekali Y. Sema-isa sangdong nung shia lir.

May 25, 2026 nü tanutsüla indang guardians-i First Information Report (FIR) ka agütsüba sülen Dimapur Police-i Special Investigation Team (SIT) ka tenteter bushisüngdanga arudar.

SIT-i iba ken o dak sendakba nung O Watimeren Jamir (43) aser Tsuktimongba Ao (37) na pua lir.

## FAC nung RUSA 2.0 kübok yangluba classroom ki lapok



**Mokokchung, 8th June (TYO):** Fazl Ali College Mokokchung nung Rashtriya Uchcharat Shiksha Abhiyan (RUSA) 2.0 mapatong kübok yangluba classroom ki ka 8th June, 2026 nü Minister for Higher Education & Tourism, Government of Nagaland, Temjen Imna Along-i meraketa lapoktsüogo.

Pai iba ki lapokja jembidang, küm pungu iba ki merenemteti atsülangdaksüba asoshi sasaa bilemba den tatok meshiba o ka mezüngbuba metetdaksü. Menur süaka iba ki asangsang nung renemtetba asoshi kisür (contractor) aser iba mapa nung amuoka inyaker ketdangsürtem dang pelaba lemsatap.

Nagaland nung RUSA 2.0 mapatong tsükdakradang kecha makai tembangtetba ya department asoshi takok tulu lir, ta pelaba olen ka metetdaksü. Ano tongtibang teinyakdak mapa kechisa anüngdaka lir, itemjia tekara nung ka sülen ka ta inyakyonga aotsü, ta paisa project tenüng kart eta metetdaksü.

Fazl Ali College nung ya Ao kin aser Mokokchung district nürburtem dang saka Naga nung songjen atema shisa agütsüba nung shilem tulu agiba asoshi pelaba ano maneni iba riju ya luyim balala nung kaketshir alakteta aser temelenshi adokdak kümdaksütsü mangdang tulu yur sayutsü pai ajungshi. Iba mangdang ataloktsü asoshi asenok ajak shilem lir ta paisa

ayongzük.

Temelenshi tuluji kenüyonga mataloker saka iba asoshi tanü asenoki metsü yoktsü nungdaker, ta pai ashi. Tanü lapokba iba ama mapatong ajanga kaketshirtem NEP 2020 mangdang den sütepa chichiba shisaliruin bushiba nung yaritsü aser shisashiba tsütsü maongka tuluba ajungkettsü imlar, ta ashi.

Iba ki FAC Union Church Pastor, Rev. Lima Lemtur-i meshitettsü. Iba sentong nung tesayur Maongienla menden liasü. FAC Principal, Dr. I. Wati Imchen-i tarur ajak pela-a agizük. Addl. Secretary, THE & SPD, PM-USHA, Sentiyanger Pongeni tepela o tatsüka lemsatap aser ki asüba osang Education Division PWD (H) Kohima, Nagaland nungi Vikhebu Yeptho-i agütsü.

Iba ki nung ya kitem (floor) ana lir. Kitem shia taktang (classroom) anana den metsü meshidak (toilet block) lir. Taktang shia nung nisung 30-45 mentettsü. Iba ki ya sen 1.80 cr intoka asü aser iba ya Imchatoshi & Sons Construction-i asü.

FAC nung sentong temer külen Temjen Imna Along den higher education department nung tulurtemi Yimyu Ward nung aliba Mokokchung College of Teacher Education (MCTE) semdanga yangji inyaksü aliba mapatong dak sentakba nung Principal Dr. T. Alemla Longkumer den sensaksema liasü.

## CM Dr. Rio-i incubation and food processing centres 4 lapoktsüogo



Nagaland Chief Minister Neiphu Rio-i June 8, 2026 nü State industrial area, Toluvi, Dimapur nung Food Processing unit ka lapoktsüdang agiba noksa angur.

**Dimapur, June 8, 2026 (TYO):** Nagaland Chief Minister Dr. Neiphu Rio-i district pezü nung incubation aser food processing centres pezü lapoktsüogo.

June 8, 2026 nü CM Dr. Rio-i Special Assistance to States for Capital Investment 2024-2025 kübok yangluba centre pezü lapoktsü aser iba ajanga entrepreneurs o aluyimertemi shishilembadak sendakteptsü aser lanur asoshi mapa aika adoktsü.

Tanü Dr. Rio-i Food Processing, State industrial area, Toluvi, Dimapur lapoktsüba sülen video conference ajanga tanüngba mapatong asem lapoktsü.

Dr. Rio-i Incubation Centre for Entrepreneurs and Infrastructure Development, Industrial Growth Centre Ganeshnagar, Chümoukedima, Incubation Centre for Food Processing, Tuensang aser Modern Aggregation Centre, Longnak, Mokokchung lapoktsüogo.

"Asenok asoshi lenmang tajungtibaji small-scale industries aser talisa food processing lir. Item incubation units tilala ya India sorkari Viksit Bharat ka yangertsüba mangdang den puteper" ta Chief Minister Dr. Rio-i ashi.

## MCCI-i tobacco & nicotine products noktangba osang tejangja metetnür

**Dimapur, June 8, 2026 (TYO):** Nagaland sorkari küm ka piyong tobacco & nicotine products noktangba ya koba anogo nungi tenzüker tejangja metetdaksütsüla aser shishilembar nem stocks yua aliba azüngtettsü mapang peria agütsütsüla ta Mokokchung Chamber of Commerce and Industry (MCCI)-i metetdaksüogo.

Sorkari public health

"Prime Minister-i 2047 nung "Viksit Bharat" atongtsü nükjidong yua lir aser iba ajanga India ya developed nation ka akümtsü. Asenoki tang külemi meinyakra, asenok tejakleni maotsü aser tai tongloksür shinga malitsü" ta pai ashi.

"Item units ya mapa küma tenzüka sülen aluyimertemi tajangzük angutsü. Sorkari district ajak nung incubation centers amenoktsü tebilemba lir. Iba ajanga pei pei tesem nung tsünusenbong adokba tajungba tsünütettsü" ta Dr. Rio-isa metetdaksü.

"Lanurtemi item maongkatem agitsü imlar kechiyong asenok dak sempet peria dang lir. Temo aketba Nagaland ali nungi adokba rongsen asenok longjemer shitak amshidi. Lanur tashi den asen sobaliba shisatsü meyoktepaba ajanga asenoki nübortem tejakleni anir otettsü" ta paisa ayongzük.

"Tanü lapokba centre pezü ya pilot projects ama lir aser jungjunga shisadanger mapa tenzüker" ta MLA & Industries & Commerce Advisor Hekani Jakhalu-ia ashi.

"Department-i tanga district tem nunga packaging units aser factories indang pilot model ajizüka inyaksü mangdang lir. 2028 tashi nung district shia nung processing center kaka

alitsü mangdang yua lir" ta Hekani-isa ashi.

"Food processing ya machines amenokba dang masü saka alu nungi factory nungi shishilembadak sendaktepba lir. Iba ya agriculture aser manufacturing tsüngda apu yangluba ama kanga tongtipang mapa ka lir" ta laisa metetdaksü.

SCERT & Food Processing Advisor Achumbemo Kikon-ia o jembidang 'Ps' 6 (Production, Processing, Preservation, Packaging, Pricing and Patenting) ajanga department len ania aotsü ta ashi.

"Sorkari iba processing unit nung mapa inyaka odi ta asüyonga production melira meinyaktettsü. Anungji asen state rongsenketzüng jenjang tajungba akümtsü asoshi imyadklirtem aser nübortemi amaliteptsüla aser pusema yaritsüla" ta Achumbemo-isa ashi.

Iba sentong nung Rural Development Minister Metsübo Jamir, Urban Development Department & Municipal Affairs Department Advisor Zhalio Rio, Agriculture Advisor Mathung Yanthan, Science and Technology Advisor Kuzholuzo Nienu, Sericulture and Minority Affairs, Advisor Imkongmar Longkumer aser MLA Dr. Sukhato Sema nung aden.

maparen inyakba pusema nungiter saka ajungba noktangba ajanga Nagaland ajungalen retailers, stockists aser wholesalers nem senotsü takoksa tulu bentsür arutsü akok. Sorkari küm ka noktangba sangdong agütsüba nung koba anogo nungi tenzüker shia mali anungji iba osang tejangja metetdaksütsü tim ta MCCI-i sorkari dang mepishiogo.

MCCI-isa sorkari dang

shishilembartemi suppliers nem prohibited products meyipa agütsütsü mesüra tanga maparen inyaksü atema ita kabosa agütsütsü mepishiogo.

Nagaland Liquor Total Prohibition (NLTP) Act ajanga ajangshiba ama black-market operators adokba ajanga public health tebilemstü tasen adoktsü ana nung lir aser tenokdangba nükjidong matongtsü ta MCCI-isa metetdaksüogo.

## TRZeliang-i Peren nung District Planning Office semzüksü



Deputy Chief Minister, Planning & Transformation and National Highways, T.R. Zeliang-i Hombarnü District Planning Office, Peren semzüksü dang tangokba noksa nung angur.

**Dimapur, Aami/June 08 (TYO):** Deputy Chief Minister, Planning & Transformation and National Highways, T.R. Zeliang-i June 8, 2026 nü District Planning Office, Peren semzüksüo.

Pai iba sentong nung jembidang, iba office semzükba ya district terenlok inyakyim nung tongtipang alizüing ka lira ser sorkar inyakyim aser nübunem service agütsüba tsütsü mera ka lir, ta ashi.

District Planning Office amenoktsü ya mapang talangka nungi nungdaka liasü, kechiaser model township nung administrative infrastructure peria alitsü tongtipang, ta ashi.

District nung terenlok maparen küm ishika tsüingta tajungba inyaka arur, kong lenmang, sorkar indang ki o jen aser tanga tongtipang facilities tem kumtettar, ta pai ashi.

Terenlok mapa atema sentong yangluba, amalitep akaba, ketdangsuba aser asadangba nung office tasenba yagi tongti shilem agitsü, aser kasa mapang ajak nem terenlok kasa agütsütsü asoshi sentong kanga junga yanglua senotsü

kumdanga amshitsü nungdaker, ta Dy. CM, T.R. Zeliang-i ashi.

Pai department balala, engineers, contractors aser terenlok mapa inyakterem dang projects tem nung tenük yoktsü, DPRs nung aliba ama inyakdaksütsü ayongzüka liasü.

Pai ano district nung aliba sorkar ketdangsur aser staff tem dang sorkari agütsüba quarters aser facilities amshitsü ayongzüker aser parnok arua aliba ajanga extended model township aser DC Headquarters tasenba wangshia akumtsü ta ashi.

Paisa nübuntem aser stakeholders ajanga dang sorkar mangdang asangsang akumtsü asoshi inyakba nung yariteptsü ayongzüka liasü.

Deputy Commissioner, Peren, Hiazu Meru-i Planning & Transformation Department dang District Planning Office sütsüba asoshi pelaba lemsatep aser District Planning Officer aser staff tem dang office tasen semzükba asoshi tepela lemsatepa liasü.

Meru-i terenlok maparen asoshi department balala tsüingta amalitepa inyaksü

nungdakba aser District Planning & Development Board (DPDB) nung temulung agütsütsü ayongzüka liasü.

'Green Peren' brand kübok alu nungi züsentetba oset tem ajungketba densema district nung terenlok maparen balala inyakba indang Meru-i lemsatep aser aluyimba aser sendaktepa aliba sectors tem nung rongsenketzüng tashi itshitsü nungdakba ashi.

Master plan nung aliba ama New District Headquarters ya model district headquarters ka ama yanglu, ta pai ashi aser Deputy Chief Minister, T.R. Zeliang dang ki o jen yanglutsüba asoshia pelaba lemsatepa liasü.

Iba sentong nung Deputy Dev. Commissioner, Peren, Heinswading menden liasü aser Pastor, District Headquarters Fellowship, Peren, Nlumbui Hengame ajanga ki tasenba meshiteta sarasademtsü.

E.E. (Planning), Er. Haulimchoba Chang-i technical report agütsü aser District Planning Officer, Peren, Danyi Domeh-i melepzüing o jembia liasü.

## DIPR ketdangsur temi Advisor Daochier I. Imchen ajuru



Advisor, IPR and Soil & Water Conservation, Daochier I. Imchen den Commissioner & Secretary, IPR, Orenthung Lotha, IAS aser Director, IPR, Dzüvinuo Theünuo aser ketdangsurtem Kohima nung June 8, 2026 nü tangokba noksa ka yangi angur.

**Dimapur, Aami/June 08 (TYO):** Advisor, Information & Public Relations and Soil & Water Conservation, Government of Nagaland, Daochier I. Imchen den Department of Information & Public Relations nungi ketdangsur temi June 8, 2026 nü Kohima nung par kidang ajurutepa liasü.

Iba mapang Commissioner & Secretary, IPR, Orenthung Lotha, IAS aser Director, IPR, Dzüvinuo Theünuo nati

Mokokchung district kübok Koridang Assembly Constituency nungi by-election nung takok anguba atema Daochier nem tenüngsang agüja liasü.

Iba sülen AHoD aser HoD nati Department nung tang teinyakdak projects aser maparen balala indang lemsatep aser pa lenisüba nung yaritepa aotsü ta ashi.

Imchen-i Department ketdangsurtem dang pelaba lemsatep aser ibai kidangi meyipa

shilangba ama lir, kechiaser tebu tasünü tashi kasa department tem bena liasü, ta ashi.

Pai Department ketdangsurtem dang pa koda masüba mapang pa den külemi yaritepa nokdakba asoshi pelaba lemsatep aser ano maneni yariteptsü ayongzüka liasü.

Paisa Department dang pa tebu mapang tenzükba projects aser maparen balala tekeraba nung inyaka tebu takum ali ama item mapa ajanga bilemtetsüsa inyaksü ayongzüka liasü.

## East Dimapur Town Council-i NSDMA dang pelaba lemsateper

**Dimapur, Aami/June 08 (TYO):** Nagaland State Disaster Management Authority (NSDMA) ajanga East Dimapur Town Council jurisdiction kübok tesem ajanga nung kilentzü aoba lenmangtem takok ngua mürekba asoshi Nagaland State Disaster Management Authority (NSDMA) dang kanga pelar, ta EDTC ajanga sangdong ka nung ashi.

NSDMA team-i bendanga agütsür mapa tajung inyakba asoshi kanga pelar, koba ajanga East Dimapur town nung müremkeju tajungba kumdaksü, tzü atsüngtena aliba nungi kumzüker aser nübuntem asoshi

libajen temürekba kumdaksür, ta ashi.

EDTC-isa nübuntem dang kilentzü aoba lenmang nung janareja meindoktsü aser mürekmejuba maparen nung amalitep akatsü ayongzüko.

Kilentzü aoba lenmang müreka ayuba mapa ajanga tajangzüker angutsü aser ajak asoshi libajen müreka alitsü atema nübuntemi shilem agia tangatetba tajung nung janareja tim yimya amshia indoktsü tongtipang lir, ta ashi.

East Dimapur Town müreka alitsü asoshi nübuntemi maneni amalitep aser teyaritep alitsü imlar, ta EDTC sangdong ajangasa ashi.



Mokokchung Press Club tenzüker küm 18 ajungba tenüing nung NH-702 D (Sewak Gate nungi Mongsenbai Ward leni aruba) lenmang nung cherry süngdong kar tema aoba mapang MPC tir, Sashimeren Jamir den külem züngsem kar noksa nung angur. MPC-i iba tesem nung süngdong atemba mapatong ya 2018 küm alima tzü mopung kümzüka aser wazüka ayuba den Mokokchung jila tobur junga kumdaksütsü nükla yur tenzükba lir. Mokokchung 8th June, 2026

## Thizama yimtsüing nung African Swine Fever pokteta lir

**Dimapur, Aami/June 08 (TYO):** Deputy Commissioner, Kohima, B. Henok Buchem, NCS-i sangdong ka nung, Department of Animal Husbandry and Veterinary Services nungi laboratory test report aruba nung Kohima district kübok Thizama yimtsüing nung African Swine Fever (ASF) poktetba jangjaogo, ta metetdaksü.

ASF ya kanga mela menatepa aoba tashidak ka lir, koba kiset shiruru asoshi tebilemstü tulu, anungji tang nungi tenzüka district administration ajanga tekumdangtsü aser teinyaktsü yimyatem sangdonger.

Thizama yimtsüing nung iba tashidak putetba nungi kilometer ka telongzüker ya Infected Zone ta sangdonger aser iba tesem nungi kilometer 10 telongzüker ya Surveillance Zone ta sangdonger.

Containment zones aser Surveillance Zone telongzüker aser iba tesem nungi ak, ak chanu, ak shi aser ak shi agi yangluba chiyongtsü tem belenba okshia nokdang, iba

tesem nung ayoktsü aser nija atema ak tepsetba, ak shi aser ak shi agi yangluba products tem ayoktsü aser alemtsü memelar, ta ashi.

Ak metsür tem dang nisung marudaksütsü, anogoshi farm disinfect asütsü aser yimya balaka nung ak shirangba mesüra asüba lira, tekeraba nung Department of Animal Husbandry and Veterinary Services nem osang agütsütsüla. Temulung melemtetsüsa ak asüba lira memonui department nem osang agütsütsüla, ta ashi.

Maneni ASF keta aliba mesüra temulung melemteti asüba shiruru tasü mang kanga kumdanga anepalua protocols nung aliba ama aremstüla. Tzü mesüra moapu nung shiruru tasü indoktsü khenyongi memelar, ta DC Kohima ajanga metetdaksü.

Item totuyuba nung aibelener kar danga lira, Prevention and Control of Infectious and Contagious Diseases in Animals Act, 2009 aser tanga tapet ozüing kübok merenshitsü, ta sangdong nungsa ashi.

# INDIA teloktepi CJl nem shidi ka agütsütsü: Mallikarjun Kharge



June 08, 2026 nü New Delhi nung opposition INDIA teloktepi senden nung Congress Tir, Mallikarjun Kharge, Lok Sabha nung opposition lenir Rahul Gandhi, TMC tongti Mamata Banerjee, National Conference lenir Omar Abdullah aser Samajwadi Party lenir, Akhilesh Yadav nung noksa nung angur.

**New Delhi, Aami/June 08 (Agencies):** Hombarnü New Delhi nung opposition INDIA teloktepi senden ka ayongzüka amenogo; iba senden nung Congress Tir Mallikarjun Kharge, TMC tongti Mamata Banerjee, National Conference lenir Omar Abdullah, Samajwadi Party lenir Akhilesh Yadav aser RJD lenir Tejashwi Yadav nung densema opposition party 25 nungi lenirtem aika aden.

Senden tembangba sülen osangbenertem den jembdian Kharge-i senden nung opposition lenirtemi lemtetba onük aika metetdaksü.

Kharge-i tekaraba nung Chief Justice of India (CJI) nem temepishiba shidi ka agütsütsü atema telemtetba agiogo, ta metetdaksü.

"SIR, vote auyaba aser election nung auyaba dak sendakba nung Chief Justice of

India nem shidi ka agütsütsü lemtetogo. Iba shidiji tekeraba nung Chief Justice of India nem agütsütsü," ta Congress Tiri metetdaksü.

Kharge-isa, NEET aser CBSE examinations ajanga kaketshirtem aika takoksa nguogo aser iba dak sendakba nung Union Education Minister-i tangsa menden nungi alutsüla ta INDIA teloktepi bangjemogo, ta metetdaksü.

Paisa INDIA teloktepi-i asalentong yanglutsü, lanurtem dak rangloker inyaksü, rejutem akhümket wazüka ayutsü aser opposition front-i longiemer inyaksü, ta metetdaksü.

Linük yimtenren tensa asadangtsü aser amalitepa asalentong yanglutsü asoshi tang nungibo INDIA teloktepi ita ana shia senden amentsü telemtetba agiogo, aser taruba sendenji August 8 nü amentsü, ta Kharge-isa metetdaksü.

"Tang linük nung rongsenkettzung jenjang majungba, mapa manguba tebilemstü, jenjang maneni atuba, aluyimertem tebilemstü onük aser nüburttem dak sendakba tongti onüktem nung o lemteptsü atema Union sorkari tangsa party ajak senden ka ayongzüksüla. Ita ana shia senden amentsü party ajaki bangjemogo. Tzüngluruwa mongpu Parliament senden mapang nunga anepdang shia Opposition lenir indang office nung opposition lenirtem senden amentsü," ta Kharge-i metetdaksü.

Hombarnü INDIA teloktepi senden nung DMK bo maden. Tawa Tamil Nadu assembly election agiba sülen Congress-i DMK toktsür Tamilaga Vettri Kazhagam (TVK) party yariba agi DMK-i Congress dang kanga mepelar, ibayongji opposition senden nung parnok maden.

# NEET paper renemertem tatidang metembang tashi mechioktsü

**New Delhi, June 08 (Agencies):** Taküm May 3 nü NEET-UG 2026 tatidang agiba sülen question paper leak asüba jungkai adokba ajanga iba tatidang agiba ajak tamagitsü kümstü aser June 21 nü iba tatidang tanaben agishitsü.

Paper leak asüba nokdangtsü atema tangbo iba tatidang question paper renemertem, yaritepertem aser oshi balala nung paper meyizüksürtem ajak mejangjaba tesem kati anir ogo, aser June 21 nü iba tatidang metembang tashi parnok shinga mechioktsü.

Ketdangsertemi ashiba agi, question paper renemertem, yaritepertem, oshi meyipzükertem aser sepaitem ajak tesem kati anir ogo. Iba denji külemi mobile phones, laptops aser tongtepratep oset kecha amshitsü memelar.

June 21 nü iba tatidang tanaben agishitsü lia Education ministry aser National Testing Agency (NTA)-i metokmeperi kecha malitsü atema tangbo iba ama ozüng tesashiji benokogo. June 21 nü iba tatidang ya India nung yimti 551 aser bendanglen aliba yimti 14 nung nikongdang

2:00 ako nungi 5:15 ako tashi agitsü.

Iba dak alia NEET question paper ji Indian Air Force tayimtsü ajanga dang belentsü. Ketdangsertemi tatidang metembang tashi social media platforms, messaging applications aser online forums ajak mita reprangtsü.

Osang angazükba agi, Union Education Minister Dharmendra Pradhan-i ketdangsertem dang tamalen tatidang agidang metokmeperi ajak jangjar metongshia inyakang, ta tuyuogo.

# India-i sensotem dang tekeraba nung Iran toktsür aotsü tuyur

**New Delhi, June 08 (Agencies):** Hombarnü Iran yimtiba, Tehran nung aliba Indian Embassy-i India nungertem dang Iran-i maotsü metetdaksüba den külemi Iran nung aliba India nungertem danga tekeraba nung Iran toktsür aotsü metetdaksüogo.

West Asia nung ano tensa tamajungba akümer, talisa tesüiba ghonda 24 tsünga tensa kanga mejungi kümogo. Israel aser Iran na tsünga missile amshia maakteper.

Indian Embassy-i, "Tang region nung tensa tamajungba akümba nung ajemdaker Embassy-i tamalen metetdaksüba ama maneni India nungertem dang Iran-i marutsü metetdaksür. Ano tang Iran nung aliba India nungertem danga transport mashie ajanga

tekeraba nung Iran toktsür aotsü metetdaksür," ta metetdaksü.

Israel aser Iran na tsünga rara tenzüka sülen Hombarnü anogo 100 ajungba anogo nunga linük ana tsünga missiles yoktepa liasü.

Iran-i pusemba Houthis teloki Red Sea nung Israel nung rong nokdangba sangdongogo.

Hombarnü Israel-i Iran nung petrochemical facility ka amak aser Iran Revolutionary Guard-ia Israel sepaitem amenoka aliba tesem ana amak.

Amongnüa Israel-i Beirut yimti tezülen maaka liasü, iba sülen Iran-ia meyiper amak tenzüka.

US Tir, Donald Trump-i Israel Ato kilonser Benjamin Netanyahu dang regional war madoktsü atema atsü-anem akatsü mepishia arudar.

# TMC MP 20-i NDA pusema Speaker dangi shidi zülutsü lemtetogo

**Kolkata, June 08 (Agencies):** Mamata Banerjee-i aniba Trinamool Congress (TMC) nung ano telemsa tuluba adoka Hombarnü Lok Sabha nung TMC MP 20-i BJP-i aniba NDA sorkar pusema Speaker, Om Birla dangi shidi ka zülutsü lemtetogo.

Chief Whip Kakoli Ghosh Dastidar leniba nung TMC MP tem jagi NDA pusema ajanga party parliamentary unit nung telemsa tulu adoktsü.

Tawa West Bengal assembly nung TMC-i tamakok mejungi ngur lia ano TMC nung telemsa adokba ya Mamata Banerjee atema takoksa tulu asütsü.

Bengal nung TMC MLA 80 nungi 58-ibo assembly nung opposition lenir menden atema Sovandeb Chattopadhyay shimba anema nokdaka liasü; iba sülen iba menden atema MLA Ritabrata Banerjee ang shim.

TMC tongti lenir, Mamata Banerjee opposition INDIA teloktepi senden nung adentsü atema Delhi-i oa aliba mapang

telemtetba agir. Osangbener den jembidang Ghosh Dastidar-i, MP temi NDA pusemstü atema telemtetba agibaji Speaker nem metetdaksüogo, ta ashi.

Ghosh-i, "Ni densema TMC MP 20-i NDA pusema Lok Sabha Speaker Om Birla dangi shidi zülutsü telemtetba agiogo," ta metetdaksü.

MP tem jagi Speaker dang Ghosh Dastidar ya maneni Lok Sabha nung party chief whip lir ta ashitsü, ta paisa metetdaksü.

Mamata Banerjee-i aniba TMC-i Ghosh Dastidar ya chief whip nungi agientsü aser la melen Kalyan Banerjee shimtsü atema telemtetba agiogo, ajisiüka parnoki iba osangji tang tashi Lok Sabha secretariat nem memetdaksü, ta TMC MP kati ashi.

Tang tashi nungbo TMC MP tem jagi TMC nungi anentsü mesüra BJP nung adentsü atema telemtetba magi, saka parnoki NDA pusema maneni parliamentary bloc temeja ka ama alitsü tebilemba lir, aser ibaji anti-defection ozüng kübok jenbuttsü atema lir.

Tang Lok Sabha nung TMC MP ajak senteper 28 lir.



June 08, 2026 nü Ranchi nung Independent candidate, Parminal Nathwani-i Rajya Sabha election nung tokteptsü atema tenüng agütsüdang tangokba noksa nung angur.

ka nung lar party MP 20-i NDA pusemstü

**केनरा बैंक Canara Bank**  
 (A Government of India Undertaking)  
**General Administration Section**  
 Circle Office, Guwahati, Dee Bee Grande,  
 Panjabari Road, Six Miles, Guwahati-781022

**TESEM NÜNGDAKER**

**TWO BID SYSTEM** kübok Ground floor nung commercial tesem alirtem aser atsünga agitsü atema renema aliba kiburtem dang nungi offers meshir, item tesem nung braches tasen lapoktsü atema iba ama tesem nungji 3-Phase Power load nungdaker, gari anendak aser tzü supply alitsüla

Branch	District	Taluk	State	Carpet Area (in Sqft)	Electric Power Load	System
Dimapur Purana Bazar	Dimapur	Dimapur Sadar	Nagaland	2000	20-25 kw	Two Bid

Osang tejanggaji Bank indang Website nung metetdaka lir:  
<https://www.canarabank.bank.in/tenders>. Nungdakba application forms mesüra temetongshitsü/amendments ji tekalen shia aliba office nungi angutsü MESüRA Bank indang Website nungi download asütsü akok. Submission atema tatembangbuba anogo aser mapangji 25/06/2026 nikongdang 03:00 tashi.  
 Place: Guwahati, Date: 09.06.2026  
 Sd/- Assistant General Manager  
 +91 7099072872; 0361-2334020, Email: pecoguw@canarabank.com



# TIR YIMYIM

## YIMOBILEM (EDITRIAL)

DIMAPUR TUESDAY, JUNE (AAMI) 09, 2026

### Yimküm tzüpu

**A**senok sobaliba nung yim tasen yateta akümdang, tamasa tzüpu mesemer aser yang nung jagi tzü tateta jema pei alitsü kimong mesemteta kiojen yangluba den ano ariju dena yangerteta yim akümer. Aji oda, asenok tsürabur yimtak asenok asoshi toktsüba tsürabur senmangtem rongnung tongtibang kaji yimküm tzüpu ya lir. Iba senmang tajungji mesamadaktsüi wazüka ayutsü asoshi tan June (Ammi) 5, Alima Lipuküm anogo nung Langpangkong Kaketshir Mungdang (LKM)-i Langpangkong nung kümteta aliba yimtsüngtem ajak nung pei pei yimküm tzüpu mesemtetshia merükteta amungba sentong jagi asen nübortem nem tangatetba tajung ka agütsüogo. Atangji, tanübo yimküm tzüpuji mesemtetshia ayuyonga yang nung jagi tzü tatetabo majemtsüa akok, kechiyong tanübo yimtsüng ajak nung pipe agi mesür aruba tzü ajemer, ajisüaka yimküm tzüpuji, tanü putu nungbo, tzüpu danga taoba, iba tzüpuji tsürabur yimkümertem taküm tenzükdkak temoatsü aser aren poktetdak. Iba yimküm tzüpu nungi yimtsüng lipok otsü tenzükder. Ashiko, tanü lanurtemibo janga pasasa dang jang kümer ki tonga arur amai bilema alitsü. Aji mesüka tzüa akhidang nungi kidang pipe nungi asenoksasa perepzüka jema aru amai bilemetsüa akok. Ajisüaka, kodang asenoki tanü lanurtem alu tonga anir or sayudir, parnoki aluyimertemi alu komaka inyaka tsük adokdaktsür aji angutsü aser angatetsü, idangji parnoki chiyongtsü jenjang tali tajungba metettsü aser aluyimertem akhümtsübuttsü. Kasaji, tang LKM-i inyakba amaji, kodang kaketshirtem ayonger pei pei yimküm tzüpu merükteta inyaka mongdir, idangji pei yim indang tali tajungba metettsü aser yimtsüng meimba shisatsü ka aittsü. Ashiko, kaketshirtem aikati pei yimtsüng yimküm tzüpu mengudangi alitsüa akok, iba jagi pei yimtsüng atema tajung bilemba shisatsü nungi tanem tanemi piladaktsür. Nisung sorubangru, shisatsü aser jakla yimya ya pei yimküm tzüpu tzü jema intetba dak tuluka keta lir. Ajisüaka, tanübo asenok aika pei yimküm tzüpu nungi dang masü saka pei litsü nungi poktetba tzü dena majemer saka tangar yimer tzü mesüa bener arua ajemer, anungji tanü lanurtem aika sorubangru aser jembishinü nung pei yimer memesük tangar yimer osü aser yimyaleni oa adokba angutsü. Ibaji asenoki bilemdanga akok tashi pei litsü nungi poktetba tzü ajemtsü merangtsüla. Aji oda, asenok asoshi teinyaktsü tongtibangtibaji asen litsü nung tzü merosepdaktsütsü aser mopung memenendaktsütsü asoshi inyaktsüba mapa ya asütsü aser item mapatem rongnungji yimküm tzüpu mesemtetshia merüktetbaji dang masü saka yimküm tzüpu nungji tzü merosepdaktsütsüsa tzüpu meketa am dong aser süngdonglidong peria indaktsütsüla aser tzüpuji ki agi sübanga mayutsüla, kechiyong tzüpu nungji anü poloktsüla. Iba amaji kodang kaketshir aser lanurtemi küm shia alima lipuküm anogo nung pei pei yimtsüng nung yimküm tzüpu merükteta mongdir, yang nung jagi ano khen yim temoatsü tenzükshitsü. Tzüpuji temoatsü lir, anungji tzüpu mesemshia merüktetbaji akhi tsürabur temoatsü bushia oa merükteter asütsü. Aji oda, tanü putu takdang nung mena yur alima ajak tonga oagi pei nungdak inyaktetba putu nunga, asenok ajak atema takdang nungi ayazüka alur tetsüng agi jajatsü, teka agi mapa inyaktsü aser pei yim tonga oagi yimküm tzüpu merüktetba nung shilem agitsübaji senso ka asoshi kanga tongtibang asütsü. Ashiko, yimtaklir lanurtemi dena pei yimküm tzüpu mengudangi alitsüa akok, kechiyong akhi tsürabur mapang ama tzüshi bener tzüpuji tzü atai aotsü nungdak madoker. Ajisüaka, yim ka asoshi yimküm tzüpuji yimkümba otsü lir. Iba tzüji jema tsüraburtem leptepsüngtep mapang timtem lendong ajuruba aser Tsüngremi kümzükba takok aser tamakok otsü aika alitsü. Item otsütemji kodang asenoki asen tsüraburi mesemtetba yimküm tzüpuji mesemtetshia wazüka ayu tenzükdir, idangji tasen küma angazüktsü. Atangji, tanü asüngbo government tsütsüa Soil & Water Conservation aser Environment & Climate Change department amaia yimtsüng shia nung yimküm tzüpu wazüka ayutsü ajungshira, iba jagi asen lima nung tzü mopong tajungba kümadoktsü.

# OLEMSABANG

## AOR TAR YIMSÜYIMBONG

~ Wt. Repabenla, Asst. Professor, FAC

### Okila

Alemlü asen Aor otsüla oboula nunger külemküja otsürenji kodang bushidangdir par taküm yimya libaliru ajak ya sentaktepa liasü. Pari amangba yimsü ya lateta ayuba yimsüyimbong ka masü, saka parnok shisatsü agi kechi tashi tsüngremji rateter aser libalirua aodang iba yabo tanela ka alitsü südi ta ajangshiba ajak nung parnoki aküm tetushi agüja külemba aru. Aorsa süaka yimtsüng aika nung külemküjaba yayim balala liasü. Kechiaser iba ya Christianity, Hinduism, Islam ama telatet ka mali asü.

Tanü Aor rongnung amungtsümung aika mamunger saka otsüla oboula nungertemi temoatsü angudang, lendong atalokdang, takoksa tia ajurudang, kirung lurung mapang, ajak nung amungtsümung munga aru. Kechiaser parnoki tia ajak ya tsüngrem kati ataloktsür ta amang. Kodangsa parnoki item tanelatemji külemdir kanga dang anembonga mesümayakasa amung. Iba külemba mapang yabo sobusolemtsüa balaka agir ola madoki tsübuseta külem. Kechiaser iba ya külempetra arishi malanger, atakatem arur ta parnoki amanga liasü.

Item ajak yagi sayur asen tetsüteboutemi külemba tar yimsüyimbong ya kangasa metsünga reta amshi, aser pari angatetba tsüngremji tapu aika liasü ta bushiteter. Parnokia asüyim ka lir ta amang aser shiri akümlü alidang ochi shia asüngteta meliteter obendangba tsüngdang meyimbanga meyeteti temeten mangur aser pa/la bo teti asoshi temerenshi angur ta jembia aru.

Tar Yimsüyimbong ajakji tajung ta ashir masü saka Khrista yimsü aruba mapang nungi tanü tashi nung Tar Yimsüyimbong tajung aika asenoki mepenshi sama-a odagi. Tanü asen putu aser yimsü den meputepa itemjibo metongshitsü nungdak, saka Tar nunger Yimsüyimbong ta sür tajung majung ajak toktsübaji tim masü ta angatet nung item ya lushia bushidangtsü nungdak ta ajiteter.

Kodang asenoki tar yimsüyimbongji shisadangdir par tokolok, shisatsü ajak nung tsüngrem ka lir ta amangba agi sünga liasü, parnok tenük agi menguaka sung, lung item ajak nung ya tanela ka lir ta amang. Anungji, pari inyakba mapa ajak nung tiatsür tsüngremji külemerang maparen ajak tenzükba otsütem nung angutsü. Par maparen kar reprangdangdi.

### 1. Amungtsümung

Akhi alemlü otsüla oboula nunger taküm chiyongtsü asoshi alu ayimba ya dang liasü. Tanü asen putu amai lenmang balala nungi züsenteta chiyunga aruba yimya ya mali asü. Parnoki metsü alitsü asoshi tzüma lenisa aluba dak alema taküm ajakji alu dak dang metaloker ali. Anungji alu tasen lepokba nungi tenzüka tsük agi ki matong tashi parnoki amung balala munga tiar külemba aru. Parnoki amangba kaji kodang kiburji peladaktsüdir iba kümji alu nung achi asüng, saka parnoki kiburji junga mekülemra iba kümji yipru mopung aser mesen, koya wara bulua arua achi masünger ta amanga aru.

Yimya agi alu tasen ka lepokbaji Mongputeni - Yimpöksü ita tsüngta lepoker, saka aremji melepokdang Süngku Lepden mung ka amungtsü. Aser iba amung atema putu yimsüsürtemi anogo ka metetdaktsür yimer ajaki amunger. Alu tasen lepokdang yiruyibong, tetsüdaktsü mesüra tasütama telidaktsü saka arem ajak meshitetja keyi, pongzü aser temenen mojing aritokja temoatsü meshia külema amungba lir. Iba sülen Süngku Mesü mung amunger, iba amung yabo shirnok alu ayimtsüpur lir parnoki pei lu/lumang meshiteta amungba lir. Iba lu nung senzüdang timtem nungi kümzükang aser molamoshia moajang ta külemer. Iba mapang ya parnoki alu jagi an bener oa, aji tezüng petoka 'na sa tama agiangji' ta shia ali nungji yi shilokja anji tepseta sor tila ka agizüker 'na tama chiang' ta shia külema 'süng züng, lung züng ajak nung meyu sa meyu jenti rena moajang ni' ta temoatsü meshia amung. Yamajisa tatongsena mongpu dak apet Alurung mung amunger. Iba tekülem nung nisung shiruru mesüra memerükba oset kar rungsema lira item ajak nungi meshitetjang ta külema amungba. Metsü Walok mung amungtsü atema yimsüsüri yimdak ayimoktsür aser putiri takar kidang nungi tsük metsü tabensa bendener oa waloker/külemer. Parnoki iba tekülem nung alu modong tajung meyitsü, tsük molulisem ama arotsü aser tsünüsembongtsü jungdakjang ta amunger. Tenden munga parnoki parnok aluyimer asoshi tsüngküm mongpu tajung atema mepishia ano tsük nungi tenzükder metsü yokba ajak junga meyitsü ano shiruru kechaia alu meraksatsütsü atema külema amunger. Aor rongnung tongtibang amung kaji Chitenmung ya lir. Iba anogo nung nokor dak alaka putu yimsüsüri anir süngpu zünga tashi yimer arem yata lenmang apitsü aser shiba kuli tajung makai mapai muolir takhang sa agia liasü. Chitenmung ya alu nung tsük tasen rozüka putiri tama tsüngrem dang temoatsü meshiba mung (Pre-harvest ritual).

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Bangladesh nung Tenla ki amakdang asürtem bilemtet



2001 kum June 3 anogo nung Bangladesh nung kiralongrartemi bomb amshia Most Holy Redeemer Tenla ki amakdang asüba Khristantem leper noksa nung angur.

**June 08, 2026:** Bangladesh nung bomb amshia Tenla ki amakdang Khristan aika asüba sülen kum 25 ajungbamong nung Khristantemi iba lendong nung asürtem bilemteta akhüm agütsüba den külemi sorkar dang asentenshir iba ken o dak sendakba nung Khristantem nem ochi temeden agüjang, ta takhangba agütsü.

June 3, 2026 nü Gopalganj district kübok Baniachar nung aliba Most Holy Redeemer Tenla kidang Khristantem adenshia tekülem sentong agiba sülen parnoki iba lendong nung asürtem leper semdanga akhüm agütsü.

Arogo nung tongti putir, David Gharami-i, iba lendong atalokba sülen kum 25 ajungbamong ya sarasademba aser tamang jenjang meyipa reprangshiba mapang ka lir, ta ashi.

Paisa, Arogo nung züngsemtemi kum 25 tejaklen bomb lendong nung asürtem maneni bilemteter, iba denji külemi yimjung osang sangdonger, ta metetdaksü.

Paisa, Khristantemi rara anemer aser ajak den yimjung nung liner, ta metetdaksü.

2001 kum June 3 anogo nung tekülem sentong tagidak mapang nung bomb amshia Tenla ki amakba lendong nung nisung 10 asü aser nisung 50 shi yirua liasü.

Harkat-ul-Jihad (HuJI) züngsemtemi bomb amshia Tenla ki amak, ta parnok nem tai tonglokja liasü. Iba mapang nungji Bangladesh nung kiralongrar telok aikati Khristantem, sobaliba teloktem aser sorkar rejutem kanga maaka liasü.

Tenla ki amakba sülen kum 25 jungogo, ajisüaka tang tashi Khristantem nem ochi temeden magütsür aser b u s h i s ü n g d a n g b a metembanger.

Iba anogomong nung Bangladesh nung Khristan lenirtemi Khristantem nem ochi temeden agüjang ta takhangba agütsü.

Bangladesh Christian Association-i sangdong ka

ajanga, iba tatalokba sülen kum 25 jungogo, ajisüaka tang tashi iba ken o mebentetba atema Khristantem mepelar, ta metetdaksü.

BCA-isa, Khristantemi lokti senden balala, sarasadem sentongtem aser awareness campaigns aika ayongzüka iba ken o bushisüngdangtsü atema aiben takhangba agütsüogo, ajisüaka tang tashi takoksa angur kibongtem nem ochi temeden magütsür, ta ashi.

Iba tatalokba bushisüngdangba maparen aser legal inyakyim mapang talangka metembanger, aser

ibaji ajanga Khristantem teimla samaogo, ta parnok metetdaksü.

Bomb amshia Tenla ki amakba mapang nungji iba Arogo nung putirji Italy nunger missionary, Mimmo Pietanza liasü.

Kum 25 ajungba anogomong nung Mimmo-ia, "Kü ministry mapang nung tejashitsü tulutibaji iba tatalokba ya liasü. Takoksa angurtem aser parnok kibongtem nem ochi temeden agütsütsü atema Arogoi ketdangsertem dang aiben ajungshia aruogo," ta metetdaksü.

# Open Doors Canada-i June 28 nü tepuokdak alirtem bilemteta amongtsü

**June 08, 2026:** 2025 kum alima tesem balala nung Khristantem puer aoba, apuba, tepuokdak ayuba mesüra ken o mangadangi temerenshi obendang agütsüba ajanga kongshiba Khristan 8,000 dak tali liasü (2026 World Watch List).

Alima tesem balala nung Khrista dak amangba atema reshikangshi ajangshirtem jenti lir, aser iba dak sendakba nung Open Doors Canada-i Canada nunger Khristantem aser Arogotem dang June 28 anogo nung tepuokdak alir Khristantem aser reshikangshi ajangshiba Khristantem bilemteta sarasadema amongtsü metetdaksü.

Open Doors Canada indang "One With Them: A Day for Christian Captives" campaign ya Ibri 13:3 nungi agizükba lir. Iba Lai tekong nung yamai zülua lir, "Tepoukdak alirtem den külemi nenok-a tepuokdak ali ama tepuokdak alirtem bilemtetang."

Open Doors Canada nungi Jared Vander Meulen-i, "Reshikangshi ajangshiba Khristantem aika atema tepuokdak ya mangutsü aser amadoktsü atema yangluba tesem ka amai lir. Alima nung Arogoi item tamangertem tenüng tet-a metettsüla, Tsüngremi parnok kanga meimer aser asen sarasadem ajanga parnok tashi itta alir," ta metetdaksü.



Iran yimtiba, Tehran nung aliba Evin Jail noksa nung angur.

Item ama tatalokbatem rongnung- 2023 kum Hakop Gochumyan'er kibongi Iran semdangba mapang nung ketdangsertemi pa pua liasü aser pa kum 10 Evin Jail nung puoktsü atema obendang agüja liasü. Pai Iran nung Arogotem semdangba aser pa ket nung Persian oshi nung Tasen Lai tenet aliba sülen pa pua aija liasü.

Nigeria nunga Leah Sharibu arrshi kum 14 asüba mapang nung Boko Haram teloki apu aser lai Khristan yimsü toktsütsü memelungba agi la mechiiok.

Cuba nung pastor ka jabaso, arrshi kum 16 Jonathan David Muir Burgos takum March ita nung apu. Longkak aitba mapang nung pa apu aser pa aitsüra kum 15 tepuokdak ayutsü.

# ANOGO ABEN TSÜNGREM DEN

## Tsüngrem lartem asoshi sarasademtsüba

*Kechiaser pa shiranga liasü ta nenoki angashi nung, Pai nenok ajak reprangtsü yongya, aser kanga timtema liasu. Filipi 2: 26.*

Kodang Filipi nung aliba arogoi Paul tepuokdak lir ta angashi, parnoki Pa asoshi teyari benden. Sempetji bener Epaphroditus yoktsü shimtet. Pai bendanga agüja Paul tenzük. Pa shirang, saka Tsüngrem taochi agi kümzük. Tsüngrem nisung den lia pa tenzüksübaji jangratemtsü ka liasu, saka Epaphroditus atema ki menungraba ka liasu.

Kidang nungi temeimer den pilaa alitsüba tanüa ajaklen ataloker. Kaket shisatsü atema kibong nungi pilar alitsüsa akümer, sepai mapa ajanga, aser tenzükba mapa tapu balala ajanga kibong nungi pilar alitsüsa akümer. Alima balala nung tenzüksü yokba ajanga kibong pilaa alitsüsa akümer.

Parnok bendang lima nung oa Tsüngrem tenzük dang asenok ama parnokia pei kibong bilemtetter, menungra aitter, ajisüaka Tsüngremi parnok kodanga senzuka medoktsür. Iba jagi parnok azüngmeyaka malir. Ammang sangwa metitemi mapang ajak nung Pai kümzüker. Yangji asenokia shilem agia, item asen tembartem asen melen, kibongtem melen, kin melen aser asen arogo melen alima talangi oa tenzükertem asoshi Kibuba dang sarasademtsütsüba asenok maongka lir.

ano tanaben miima ayutsü. Open Doors Canada-isa tamangertem den anogo shia sarasademtsü onüktem lemsatepogo.

Iba campaign ya June 28 aonung 7:00 ako nung tembangtsü.

Vander Meulen-i, "Kodang tamangertem tepuokdak puokdir alima kanga keraa aoer. 'One With Them' campaign ya item ama tepuokdak aliba Khristantem mamatoktsü atema lir. Asenoki parnok den külemi mementettsü akok, ajisüaka tamang nung asenoki parnok bilemteta parnok asoshi sarasademtsütsü akok," ta metetdaksü.

Open Doors organization yagi linük 70 dak tema nung reshikangshi ajangshiba Khristantem nungita yaria arudar. Parnokisa tepuokdak aliba Khristantem, puer aoba Khristantem, ken o mangadangi pua aliba Khristantem aser house arrest asüba Khristantem atema asentenshir iba campaign ayongzüka akar.

Open Doors-isa Laishiba lema agütsür, pastor tem nem training agütsür aser Arogotem nem 'resources' agütsür. Parnoki kum shia alima tesem balala nung Khristantem reshikangshiba osang tejangja metetdakja World Watch List report sangdonger.

Takum Yemen nunga Magid apuba sülen jail ka nung puokogo.

Open Doors-i ashiba agi, tang North Korean labor camps nung Khristan 60,000 shi lir. North Korea nungbo Laishiba tapak ka danga bena lia pura kibong züngsem ajak takum piyong tepuokdak ayutsü akok.

"One With Them: A Day for Christian Captives" campaign dak sendakba nung Open Doors Canada-i anogo troknü 'One With Them Challenge' tenzuka kija-kibongtem aser Arogotem dang shilem agitsü ayongzükogo.

Kija-kibongtem, telok tila mesüra Arogotemi North Korea nung tamangertem nungita anogo troknü tashi Laishiba miima ayutsü, anogo shia Laishibaji azüngba sülen

### AO OSHI ANGAZÜKDAK:

#### TANÜ ANGAZÜKTSÜBA OJANG



**Yimlok**

(v) nübu anioksemba, bushilokba ( add more worker)

\* Alu tuluka asüba agi nübu yimlok.

**Yimlong**

(n) sü atak dang amshiba oset ka (weaving implement)

\* Sü atakertemi anet lutettsü atema yimlong amshir.

### OLONG PAITEP # 7529

1					2				3
							4		
5		6			7				
8									9
							10		
				11		12			
		13							
14						15			
				16					

**TIPIEN**

- 1. Ojembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

**LANGTSÜNGLEN**

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

### OLONG PAITEP # 7528 TELANGZÜBA

**TIPIEN :**

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kiochtsü, 17. Itsük,
- 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua,
- 5. Mitsüchtsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

### NAI-A YA METETTER



Germany nunger Andre Ortoif-i minute ka nung ninang mojitzü teimtiba achiba indang alima otsü tasen ka yangluogo.

Augsburg, Bavaria nung sentong ka nung Andre-i second 60 tsüngda honey 1,273 grams (44.91 ounces) chiteta liasü aser iba ajanga "most honey eaten in one minute" angu ta Guinness World Records ajanga metetdaksüogo.

## Arunachal CM-i World Bicycle Day sentong ayongba atema pelar



**Itanagar, June 8, 2026**  
**(Agencies):** Department of Sports & Youth Affairs, Arunachal Cycling Association, Sports Authority of India aser My Bharat yaritepa World Bicycle Day sentong ayongba agiba atema tenüngsang agütsür ta Arunachal Pradesh Chief Minister Pema Khandu-i metetdaksüogo.

Iba sentong ajanga fitness, healthy living aser sustainable

transportation indang osang prokshir ta pai ashi. World Bicycle Day ajanga nübortem dang active lifestyles alitsü nenshir, environmentally friendly modes transport amshitsü ajungmesor aser loktiliba ajungtsü asoshi merangba osang sangoktsür ta CM Pema Khandu-i ashi. Cycling ya fitness aser

recreation dang masü saka carbon emissions ajema kümdaktsütsü inyakyim ka aser lipoküm merükba nung yariteper ta paisa ashi. Iba sentong ayongzüker nem tenüngsang agütsür aser public-ia physical well-being o eco-friendly mobility ajungketba sentongtem nung shilem agitsü ayongzüker ta CM Khandu-isa metetdaksü.

## Manipur DGP Mukesh Singh-i Kangpokpi district semdang

**Imphal, June 8, 2026**  
**(Agencies):** Manipur nung Director General of Police (DGP) tasen Mukesh Singh-i Deobarnü Kangpokpi district semdangogo aser idakji senden balala menogo.

Mukesh Singh-i police ketdangsürtem, Central Reserve Police Force (CRPF) personnel aser Kuki-Zo civil society organisations teshimtet nübotem den ajurutepa sendentem amen.

Kangpokpi nung Superintendent of Police (SP) Office nung Mukesh Singh pelashishia agizük. Kuki Inpi Manipur (KIM)-i anir Kuki-Zo

civil society organizations aikati pa pelaa agizük aser naro den sobaliba sü sempettsü. Additional Director General of Police (Law and Order) Lhari Dorjee, IPS den tongti ketdangsürtemi DGP Singh meina liasü.

Iba ajanga Manipur Police ketdangsürtemi teküpoktiba jenjang nung alirtem den indangindanga jembitsü merangba sayur. Kuki Inpi Manipur-i Manipur DGP nem tapak asem aliba memorandum ka agütsü aser iba nung Kuki-Zo nunger tebilemstütem shia lir.

Iba memorandum nung security, civilian takümtem kümzüchtsü, public tamang kadaktsütsü aser law and order timi inyaktsü indang shia lir.

DGP Singh-isa SP Office conference hall nung district police ketdangsürtem den senden ka amen. Senden nung ADGP (Training) Lunsieh Kipgen, IPS, Superintendent of Police Kangpokpi Rahul Gupta, IPS, aser tanga district police ketdangsürtem aden. Mukesh Singh-isa Kangpokpi nung mapa lemszüka aliba CRPF ketdangsürtem den-a ajurutep.

## Japanese PM Sanae Takaichi-i Assam semdangtsü akok

**Guwahati, June 8, 2026**  
**(Agencies):** Japanese Prime Minister Sanae Takaichi-i taküm July ita India semdangi arudang Assam semdangtsü akok ta NHK WORLD-JAPAN-i metetdaksüogo.

Takaichi-i July ita tetenzüklen Prime Minister Narendra Modi den senden amentsü atema India-i arutsü akok ta public broadcaster NHK indang international broadcasting service

ajanga metetdaksü. Takaichi-i Assam semdangtsü atema sentong renemdar ta Japanese sorkar osang ajanga angazüker.

Takaichi aser Modi nati security aser economic engagement dena onük aika lemsateptsü. Yaküm Modi-i Japan semdangdang sangoktsüba ama tenati taruba küm 10 asoshi Japan-India joint

vision yanglutsü. Taoba Japanese Prime Minister Shinzo Abe-i Guwahati semdangtsü sentong atongba sülen küm trok shi lir külen PM Takaichi-i Assam semdangtsü sentong renemer. December 2019 nung Assam nung Citizenship (Amendment) Act (CAA) anema lungkak aitba ajanga Shinzo Abe-i semdangtsü aliba athitsüsa aküm.



Assam Governor nungi temelaba anguba sülen Assam Chief Minister Dr. Himanta Biswa Sarma-i June 8, 2026 nü Council of Ministers nung züngsemtem nem portfolios lemsatsüba sentong nung agiba noksa ka angur. CM Sarma-i Home & Political, Public Works Department (Buildings & National Highways), Public Works Department (Roads), Power, and Information, Public Relations, Printing & Stationery department tem maneni abentsü ta Chief Minister's Office (CMO) sangdong ka nung metetdaksü. Maneni tanga minister tem nem melemzüchtsüba department tem pai reprangtsü ta CMO-isa ashi.

## Southern Philippines nung menoknok agi nisung 32 asü



Menoknok agi raksatsür aliba ki ka noksa nung angur.

**Manila, Aami/June 08 (Agencies):** Hombarnü Philippines south tsütsü Mindanao asetkong nung menoknok magnitude 7.8 anokba ajanga nisung asüba 32 jungogo aser aika yiru, ta ketdangsür temi ashir aser Manila nung search and rescue operations mera tali agiba mapang lir.

Iba menoknok ya Sarangani province nungi kilometer 20 shi pilar anepdang züngia lia anoka Mindanao nunga kanga sashia anokshitsü aser kilometer 420 pilar Indonesia indang Sulawesi asetkong nung aliba Manado yimti nung alir temia metet, koba ajanga linük kar nung tsunami warnings sangdonga lir.

Philippines nung mitkar aser disaster response teams tem teyari amshir aser ketdangsür temi Mindanao nung nisung 32 asü aser 134 yiru ta osang sangdonga aliba jangjatepba mapang lir, shirnok timba ki o

jen laoba aser alinen ajanga asü, ta civil defence ketdangsür temi ashir.

Ghonda trok dak tema lir southern Philippines, northern Indonesia aser Malaysia linük nung Borneo asetkong kübok Sabah state tem nung tsunami warning ya agienogo, kong tzükum anasa alirtem dang tenemlen bushia aotsü totuyuba agütsür liasü.

Philippines nung ita ti tejakdang Cebu asetkong nung menoknok 6.9 magnitude anoka nisung 79 takum samatsüba sülen tang iba lendong ya ajuru. Hopta ana lir Mindanao nung menoknok anaben anak aser tesashiba ya magnitude 7.4 liasü.

Philippines Tir Ferdinand Marcos Jr-i tekeraba nung Mindanao nung teyari agütsüsü tuyuogo, koba tasazük South Korea teka lir, aser agencies balala dang relief supplies aser evacuation centres renemtsü

ashi aser rescue operations atema renema alitsü metetdaksü.

"Linük sorkar arakzütar aser Mindanao tesülen metoktsütsü," ta Marcos-i sangdong ka nung ashi.

Philippines aser Indonesia nung küm shia menoknok noklang dak tema anoker, koba "Pacific Ring of Fire" ta ajaba South America nungi Russian Far East tashi menoknok kanga anokba tesem nung lir.

Ki o jen raksaba tang tashi asadanger aser nisung 700,000 shi aliba General Santos yimti nung tesashitaba kongshi, kong dokan aser ki raksa aser kar chirepa liasü.

Philippines seismology agency ajanga ashiba agi, aftershocks 200 dak tema liasü aser item rongnung kanga sashia tokuben anokba Mindanao tesem ajunga nungi metet aser tesashitaba ya magnitude 6.7 liasü.

## PoK nung Pakistan mitkari nisung 27 tepset: JAAC

**Rawalkot, Aami/June 08 (Agencies):** Rawalkot nung Pakistan mitkar aser security forces temi ozüng tesashi amshi ta Joint Awami Action Committee (JAAC) aser yangji aliba activists temi tai tongloktsüba sülen Pakistan-occupied Kashmir (PoK) nung tensa kanga mejungi kuma lir.

JAAC lenirtemi ashiba agi, security personnel temi mangyimer aser longkak aiter dak injang khaloktsü, shirnok Pakistan Rangers temi Hokulbarnü tepsetba longkak aiter Shahzaib Habib den tepila sentong agitsü asoshi Rawalakot nung aliba Combined Military Hospital kima adenshia lir.

Iba sentong nungya Awami Action Committee züngsem aser lenirtem dena liasü aser aika Pakistan mitkar anema yimyim ayima region nung tawa inyaksangshiba indang ochi temai adoktsü khanga liasü.

Iba operation mapang longkak aiter nisung 27 tepset aser aika yiru ta committee-i ashir. Yangji alir karibo Pakistan security forces temi longkak aiter nisung 100 dak tema tepset ta ashir.

JAAC-isa ashiba agi, mozüki telungzük nungi iba tesem nung alir nisung 110 shi puogo aser tang tesüsa security mapa inyakba sülen ano nisung aika samar bushir. JAAC lenirtemisa longkak aiter tepsetba tasü mang ketdangsür temi yua lir ta tai tongloktsür, saka item osang yabo tejangja masü.

PoK nung rongsenketzüng jenjang mejungi akumba, asüpila sentong ka alidang yimtenren temeden aser security forces temi tashi tali amshiba nung rangloker sorkar anema longkak aitba tali akumba mapang tang tesüsa iba ya ataloker. Aji masü dang longkak aitba mapang azüdokshia anatsülen nisung asüba sülen tensa tali tamajungba akum.

Yangji aliba activist telok temi ashiba agi, Azad Kashmir Police nungi züngsem pezü aser Rangers and Frontier Corps nungi züngsem asem densema Pakistan indang security ketdangsür tenet tang mepetmesü mapang süogo. Ajisüaka longkak aitba lenirtemi tai tongloktsüba nung ketdangsür temi yimjak nung sangdong kecha agüja mali.

Ozüng tesashi amshia tensa azüokba ya yimtung nung longkak aiter azüokba kisüng masü. Iba occupied region nung tesüba anogo pezü tsüngta tesem balala meita aoba mapang nisung 350 jungnüa puogo, ta activists temi ashir.

Parnokisa ketdangsür temi Joint Awami Action Committee indang central office shibangtsü aser tiazü nung mapa tamajung inyakba ken o benoka lir aser yangji JAAC züngsem kari temelaba makai injang-bomb amshiba dak sendakba dena lir, ta ashir.

Iba yagi PoK nung tensa tali tamajungba kumdaksür, kong Awami Action Committee ya administration aser security establishment anema ola adoker tejangjatiba kumogo.

## Houthi teloki Red Sea nung Israel nunger rong nem tenokdangba agütsü

**Sanaa, Aami/June 8 (Agencies):** Yemen nung Iran-i teyari agütsüba Houthi teloki Hombarnü missile amshia Israel amakba metetdaksüogo, aser Red Sea nung Israel nunger rongtem nem tenokdangba agütsüba sangdongogo. Tenokdangba agütsüba ajanga iba tongtibang tzü lenmang nung maneni tetsükdaksü adokogo.

Israel aser Hamasa na raraba mapang iba tongtibang tzü lenmang nung Houthi teloki khu abenba rongtem amak, aser iba ajanga company balalai lenmang talangba amshia southern Africa len nungi senzüa liasü.

US-Israel nati Iran amakba ajanga Gulf sea kikümtong aser totzü shibelenertem atema tongtibang lenmang, Strait of Hormuz Iran-i shibangtsür aliba mapang tang iba lenmang ya-a nokdangogo.

"Red Sea nung Israel nunger rongtem senzüsenpongtsü atema tenokdangba agütsüba sangdonger," ta Houthi telok armed force-i metetdaksü.

"Osang agütsüba mapang nungi tenzuka onoki tsükchirtem senzüsenpong ajak ya onok indang armed force tem atema military target tem ama züngshitsü," ta iba telok yagi ashi.

Houthis, shirnoki Iran pusema March ita Middle East rara nung dena liasü, parnoki April 8 nü nungi tenzuka ceasefire benokba sülen Israel dak missile khaloktsüba khen danga sangdonger maliasü.

Parnokisa, Israel dak missile ka khalokja parnoki khaloktsünüba tesem shitak nung khaloktsüba metetdaksüogo.

Israel military-ia Telegram ajanga, parnoki Yemen nungi Israel dak missile ka khaloktsüba putetogo aser amokmeren ajak nokdangtsü atema aerial defense system tem inyaksangshidar, ta metetdaksü.

Yemen nung sorkar anemba iba telok yagi küm ter dak tema linük north len tesem tuluba ka atsünger lir. Parnoki 2014 küm September ita linük yimtiba atsünga sorkar mintoka liasü.

Saudi-i aniba international military telok kati 2015 küm March ita iba telok amakba sülen civil war ka tenzük aser iba ajanga nisung meyirejang aika taküm samaogo.

Israel aser Iran na Hombarnü kati ka maktepba mapang Houthis teloki Israel dak missile ya khaloktsüogo aser iba ajanga ceasefire nung tetsükdaksü adokdaksüogo aser yimjung atema sensaksema aliba amokmerener.

Iran state media sangdong ka ajanga ashiba agi, Hombarnü linük yimtiba Tehran nung bomb apokba ola angashiogo, ajisüaka item bomb tem ya khadangba mapang apok asü tesem balala dak kongshiba sülen apok aji mejangja.

Taoba mapang Israel military-i ashiba agi, Iran-i northern Israel amakba sülen

parnokia southwestern Iran kübok Mahshahr nung petrochemical complex ka aser military target balala makogo.

IRGC-i ashiba agi, parnoki Israel kübok Haifa nung chemical plant ka makogo. Tabriz aser Isfahan nunga bomb apokba ola angashiogo.

Deobarnü Iran nunger sepaitemi missile aika yoka northern Israel amakba sülen rara tamajungba kümshia liasü. United States aser Israel na den April ita ceasefire atema tenangzüktepba yangkluba sülen Israel-i Beirut south len tesem balala amakba atema telangzüba agüja tang mezüngbuba Iran-i iba tesem maka liasü.

Israel-i ashiba agi, parnoki Beirut tezülen Iran den sendaktepa aliba Hezbollah telok amendaka aliba tesemtem amak. Taoba hopta Washington-i ceasefire ka sangdongba sülen tang mezüngbuba Lebanon yimtiba ya makogo.

Iran indang Central

Command otongdar Ebrahim Zolfaghari-i, Beirut amaktsü atema Israel nem temelaba agütsüba atema US aitsüogo.

Tehran-i, Washington den tenangzüktepba yangluba nung Lebanon-a densemdaksütsüla ta shia arudar. Iran aser US na rara tenzükba sülen Israel-i hopta ishika tsüngda Lebanon maka linük south len tesem timba atsünga odar. Israel-i ashiba agi, Hezbollah teloki rocket aser drone tem amshia northern Israel amakba nokdangtsü atema parnoki iba jenjang agir.

Washington aser Tehran na Strait of Hormuz lapokshitsü atema ceasefire atsülangshitsü asoshi sensaksema mapang tang telok balala tsüngda khatepba osang angazükogo.

US-Israel nati February 28 nü Iran amak tenzükba sülen Strait of Hormuz shibangba ajanga alima ajunga nung energy jenjang timba kümogo. Telok ana maneni khatepba sülen Hombarnü Brent crude jenjang barrel ka nung USD 97 dak tema kümogo.

## Perez tanaben shimshiba sülen Mourinho Real coach akümtsü Eriksen süjia aoba sülen temang tajungba lir



**Aami/June 8, 2026 (Agencies):** Club tir mapa 2030 tashi maneni abentsü atema Florentino Perez shimshiba sülen Jose Mourinho Real Madrid indang head coach akümtsü jangjaogo.

Arishi küm 63 tain Mourinho-i taoba ita Real indang head coach akümtsü atema küm asem asoshi tenangzüktepba yanglu, saka Perez tanaben shimshi nungdang pa den tenangzüktepba yangluba ya agitsü liasü.

Arishi küm 79 tain Perez shibai vote shilem 65 ngua liasü, pai iba mapa ya 2009 küm nungi bona liasü aser pai taoba ita news conference ka nung election agitsüba sangdonga liasü.

"Onoki election kokogo aser

title balala abentsü atema maneni inyaksü," ta Perez-i ashi. "Ni idaki maneni lir aser ni Real Madrid atema idaki lir."

"Real Madrid-i maneni title tem abentsü atema onoki maneni inyaksü aser 16buba European Cup abentsü atema tatem tashi raratsü.

"Alima nung asayar tajungtibatem atema nema adanger, Jose Mourinho amala Madridista ka aser alima nung coach tajungtiba rongnung ka pelashishia agizüksü nema danga bilemer. Ni tir ama Real Madrid koma liasü yamaji dang alitsü aser club ya maneni züngsemtem meyong asütsü," ta pai ashi.

Perez-i 2010 küm Mourinho ya Real Madrid coach asütsü shima liasü.

Real Madrid ya züngsemtem meyong lir, shirnoki tir shimer. Küm 20 sülen taküm mezüngbuba tir election agiogo. Perez den renewable energy magnate Enrique Riquelme toktepa liasü.

Perez maneni shimtsü imla liasü aser pai pa shimra nungtugu asayar ka atema otsüsüsüsa offer ka agütsüsü ta tenangzükba agüja liasü.


Election nung Perez-i vote 21,741 angu aser Riquelme-i vote 11,814 ngua liasü.

Mourinho-i Benfica nung coach mapa toktsüsü. Pa iba club nung September ita aden aser Primeira Liga nung iba team tasembuba jenjang tonga ania liasü.

Taoba mapang 2010 nungi 2013 tashi Real coach mapa bener aliba mapang Portugal nung coach yagi La Liga, Copa del Rey aser Spanish Super Cup koka liasü.

Mourinho-i Alvaro Arbeloa melentsü, shibai January ita Xabi Alonso-i club toktsüba sülen coach mapa agizüka liasü.

Real puri 2025-26 nung takok marok ka danga mekoktet aser parnok den toktepa asayaba Barcelona-i La Liga koka liasü.



**Aami/June 8, 2026 (Agencies):** Ukraine den friendly ka asayaba mapang süjia aoba sülen Christian Eriksen temang tajungba lir, aser pa yakta mozüki nungi yoktsü imlar, ta Denmark indang national team doctor Morten Boesen-i ashi.

Christian süjia aoba sülen Odense nung asaya ya minute 65buba nung anendaksü aser iba sülen thija liasü. Arishi küm 34 tain asayar ya shia aruba sülen ground nungi jaja tugua liasü.

Taoba mapang Manchester United, Tottenham aser Brentford midfielder ya Implantable Cardioverter Defibrillator (ICD)-pacemaker tapu ka-ka enokja lir. Pa 2021 küm Finland den Euro asayaba mapang temulung mapa minyak akümba sülen iba pacemaker ya enoker lir.

"Ni tanep Christian den jembio aser pa junga lir. Pa aser par kibong kanga junga lir," ta Boesen-i ashi.

"Pa yakta mozüki nungi yoka kidangi aotsü imlar," ta paisa shisem.

ICD enoktsüba sülen Eriksen

2022 küm nungi Brentford nung asaya tenzük. Iba sülen pa Manchester United nungi küm asem asaya liasü.

Deobarnü Boesen-i, pacemaker yagi koma telangzüba agütsüsü ali yamaji agütsüogo, ta ashi.

2022 küm asaya metenzük tsüngda BBC Sports den jembiba mapang Eriksen, shiba tang Wolfsburg nungi asayar, pai ICD enoker asayatsü kecha tebilemtsü mali ta ashi.

Denmark aser Ukraine naprongla Brehostibarnü nungi tenzük asayatsü aliba World Cup atema qualify mesütet.

Eriksen süjia aoba sülen temang anepaluba mapang team anaprongla nungi asayartemi pa longbanga liasü.

Euro 2020 nung temulungjang mapa minyak akümba sülen Eriksen Inter Milan den contract yanglur aliba tangatettep nung tembangdaksü, kechiyong ICD enoker aliba asayartem Serie A nung asayatsü memelar.

Ajisüaka Premier League aser Bundesliga nungbo iba ozüing ya benoka mali.

## India-i innings ka aser run 300 agi Afghanistan kokogo

**Aami/June 8, 2026 (Agencies):** Maharaja Yadavindra Singh International Cricket Stadium, New Chandigarh nung Afghanistan team innings ka aser run 300 agi akokba asaya nung left-arm spinner Manav Suthar-i India atema kanga tongtibang shilem agiogo.

Arishi küm 23buba nung tang mezüngbuba Test asayaba mapang Rajasthan nungi asayar yagi kanga junga asaya-a pai mezüngbuba innings nung run 33 agütsür wicket 6 agi aser tanabuba innings nunga wicket ka agia ajak senteper iba Test asaya nung wicket 7 agia liasü. Pai kanga junga asayaba ajanga India team takok dangi aniba dang masü saka pa ya Test asaya nung Ravindra Jadeja melentsüpurtem rongnung ka ama reprangteter.

Asaya nung Afghanistan nung batter temi Suthar nem telangzüba magütsütet. Pai ball kanga junga azüoka tesem shitak nung ball aonba den ball turn süa aonba ajanga batter tem nem timtem agütsü.

Pai run 33 agütsür wicket 6 agiba sülen pa India nung spinner tem rongnung Test nungi mezüngbuba asaya nung wicket pongu agiba asayar tenetbuba kümdaktsüogo. Maneni mezüngbuba Test nung innings ka nung wicket trok agiba India nung bowler tem rongnunga pa züngoksemogo.

Küm 38 tsüngda India

nung bowler tem rongnungi pai Test nung mezüngbuba asayaba mapang wicket timtiba agiogo.

India nung bowler tem rongnungi Narendra Hirwani-i tatensa pa dang nungi wicket timba agir lir. 1988 küm Chennai nung West Indies den asayaba mapang pai mezüngbuba innings nung wicket 8 agi aser iba asaya nung pai ajak senteper wicket 16 agia liasü.

Ravichandran Ashwin asaya nungi anenba den Jadeja-a test career tatembang ka dangi aruba mapang Suthar ya mapa shitak nung asaya tenzükera ama bilemer.

Mezüng batting amenba sülen KL Rahul aser captain Shubman Gill nati century kaka azük aser Rishabh Pant aser Washington Sundar nungeria half century kaka yanglua team nem teyari agütsü.

Iba sülen India team-i asayar 8 out ser run 564 yanglur aliba mapang declare süa Afghanistan pressure nung toktsü. Batting amenba mapang Afghanistan team-i asayar ajak out ser run 152 dang yangluteta parnoki India run 412-i memenepi liasü.

Follow on achiba sülen Afghanistan team-i tanabuba innings nunga junga masayatet. Washington Sundar-i run 36 agütsür wicket 4 agi aser Kuldeep Yadav-ia run 30 agütsür wicket agia Afghanistan team nungi

asayartem over 35.5 nung run 112 dang yanglur ajak out sütsü.

Innings ka aser run 300 agi asaya akokba ya India team-i Test asaya nung takok tajungtiba anguba asütsü. Parnoki 2018 küm Rajkot nung West Indies innings ka aser run 272 agi koker liasü.

## Tamim Bangladesh Cricket Board tir tanobusang kümogo

**Aami/June 8, 2026 (Agencies):** Taoba mapang Bangladesh captain Tamim Iqbal, Bangladesh Cricket Board tir asütsü shimba sülen pa ya iba mapang abenertem rongnung tanobusang kümogo.

Arishi küm 37 tain taoba mapang asayar yagi Sher-e Bangla National Stadium nung election mapang councillor temi vote 75 agütsüba nungi vote 73 ngua liasü.

Tamim ya BCB indang ad-hoc committee mendenbuba liasü aser tang küm pezü atema iba mapa agizükogo. Ken o bushisüngdanga taoba board nung lenirtem mapa nungi anentsüba sülen committee mendenbuba mapa ya pai April ita agizüka liasü.

Election tembangba sülen jembiba mapang Tamim-i, BCB temzüng ozüing nung tongtibang temelenshi kar bener arutsü atema stakeholder tem nungi teyari nungdaksü ta ashi.

"Tinyaksü aser tapok aika lir, aser asenok ajaki mulunga agizükra (temzüng ozüing

melenshitsu indang) onoki taruba AGM nung sensak asemstsü. Iba ya züngsem 12 mesüra 13 aliba board nung nisung kati langka ashitsü aser inyaksü ta masü," ta pai ashi.

"Onoki councillor 1972 den angatettepa inyaksüla. Anungji parnokia agizüksüla. Ajisüaka Bangladesh cricket ajangzükdaksütsü atema temzüng ozüing nung temelenshi kar danga nungdakra onoki parnok den sensak asemstsü," ta pai ashi.

Taoba mapang opener shiba Bangladesh tenüing nungi Test 70 aser ODI 243 nung asayaogo, pai ashiba agi, temelenshi bener maru tsüngda pai board inyakyim tama angatettsü nungdaker.

Tamim-isa, pa tangang cricket administration züngsem aika den metetpelaba mapang lir ta ashiba

den lenir tasentem atasatsü mepeshia liasü.

"Iba ya kü atema mapa tasen kechiyong ni item nisung ajak den metetteptsü nungdaker. Ni parnok tesadang dang nungi talia memeteti alitsü. Ni parnok tang mezüngbuba ajurur. Anungji mapang tatsüka atasa-ang. Onoki sensaksemdi aser kechi nung temelenshitsu nungdaker aji bushitetti," ta pai ashi.

Paisa board inyakyim merek mereka bener aotsü aser mepetmesü nungi pila alitsü merangtsü ta tenangzükba agütsü.

"Onoki takok tashi inyakyim merek mereka inyaksü. Kechiyong ni board züngsem shinga nema mepemesü adoktsüsa kecha minyadaksüner. Ni aser board ajungai takok tashi ochishia inyaksü," ta pai shisem.

### BILEMDANGANG

"Nai telemtetba tajung ka agiba ajanga ajak melenshitsu akok."